

Uunga siunnersuut: Nerukkaatissanut akussat pillugit inatsisip Kalaallit Nunaannut Kunngip peqqussutaatigut atuutilersinneqarnissaanik Namminersorlutik Oqartussanit akuerineqarnera pillugu Inatsisartut aalajangiinerat
(Aalisarnermut Piniarnermullu Naalakkersuisoq)

Saqqummiussineq

(Aalisarnermut Piniarnermullu Naalakkersuisoq)

Siullermeerneqarnera

Nerukkaatissanut akussat pillugit inatsisip Kalaallit Nunaannut Kunngip peqqussutaatigut atuutilersinneqarnissaanik Namminersorlutik Oqartussanit akuerineqarnissaanik aalajangiiffigisassatut siunnersuut Naalakkersuisut matumuuna saqqummiuppaat.

Peqqussummi siunertaavoq nerukkaatissalerinnermut malittarisassiornissamut piginnaatitsisoqarnisaa, taamaalilluni aalisarnermik inuussutissarsiortugut aalisakkanit qajuusianik uulianillu nerukkaatissatut avammut tuniniaasinnaaniassamata, taamaalillutillu Kalaallit Nunaannut pisatik Kalaallit Nunaannut iluaqutaanerusunngortillugit pisuussutitsinnillu nungusaataanngitsumik aqutsilluarnerusutut atorluarlugit.

Peqqusutip sinaakkutaasa iluanni malittarisassanik assigiinngitsunik aalajangersaasoqarsinnaavoq, apeqqutaatillugu nerukkaatissaq/nerukkaatissat uumasunit inuussutissanik tunisassiornermut imaluunniit uumasunit inuussutissanut ilanngunneqartusaanngitsunut naatsorsuussaansut. Aamma nerukkaatissap/nerukkaatissat akuinut avammut tuniniaanissaq siunertaralugu tunisassiarineqartunut aamma nerukkaatissanut taamaallaat nunami namminermi atugassanut tunisassiarineqartunut piumasaqaatinik assigiinngiiaartunik aalajangersaasoqarsinnaavoq.

Siulliullugu malittarisassat tunisassiornermut atuinermullu tunngasut aalajangersarneqasapput, tassunga ilanngullugit Kalaallit Nunaanni ullumikkut eqqussuineq avammullu tuniniaaneq. Taamaalilluni Kalaallit Nunaanni nerukkaatissanut avammut tuniniarneqartunut malittarisassani taamaallaat ilaapput aalisakkanit qajuusalianik, aalisakkanit uuliamik aamma aalisakkanik panertunik (ammassannik) avammut tuniniarneqartussanik tunisassiorneq. Malittarisassat imarisaat annertussusiallu malittarisassiornissamik pisariaqartitsinermi allannguutit ingerlaavartumik naleqqussarneqartassapput.

Danmarkimi Inuussutissanut Aqutsisoqarfik nakkutilliisuusaaq misissuisassallunilu il.il. aamma Inuussutissanut Aqutsisoqarfik ilaatigut inuussutissat avammut tuniniarneranni taamaaliortareerpoq.

Siunertaavoq Kunngip peqqussutaa ulloq 1. januar 2023 atuutilersinneqassasoq.

Naalakkersuisut taamatut oqaaseqarlutik immikoortoq Inatsisartunut suliassanngortippaat.